

四庫全書

經部

欽定四庫全書

六家詩名物疏卷三十六 明 馮復京 撰

小雅鴻雁之什一

鴻雁篇

鰥

釋名云鰥昆也昆明也愁悵不寐目恒鰥鰥然故其字從魚魚目恒不閉者也○白虎通云鰥之言鰥鰥無所親也○孝經注云男子六十無妻曰鰥○禮記云少而

無父者謂之孤老而無子者謂之獨老而無妻者謂之鰥老而無夫者謂之寡此四者天民之窮而無告者也皆有常餼

寡

小爾雅云凡無妻無夫通謂之寡寡夫曰嫠寡婦曰嫠  
○釋名云寡嫠也嫠嫠單獨之言也○孝經注云婦人五十無夫曰寡○禮記疏云男子無妻亦謂之寡左傳云崔杼生成及疆而寡

# 堵

說文云垣也五版為堵○傳云一丈為版五版為堵箋云春秋傳曰五版為堵五堵為雉雉長三丈則版六尺疏云毛言五版為堵謂累五版也版廣二尺故周禮說一堵之牆長丈高一丈是版廣二尺也傳以一丈為版鄭欲易之故引公羊傳文以證版之長短○韓詩說云八尺為版五版為堵五堵為雉又云堵四十尺雉二百尺以板長八尺接五版而為堵接五堵而為雉

宅

說文云所託也○釋名云宅擇也言擇吉處而營之也  
○尉繚子云天子宅千畝諸侯宅百畝大夫以下里舍  
九畝○周禮云國宅無征注云城中之宅無稅

庭燎篇

庭燎

周禮閹人大祭祀喪紀之事設門燎賓客亦如之司烜  
氏凡邦之大事共墳燭庭燎注云墳大也樹於門外曰

大燭於門內曰庭燎皆所以照衆為明疏云庭燎以葦  
為中心以布纏之飴蜜灌之若今蠟燭或以百般一處  
束之或百處設之若人所執者用荆樵為之執燭抱樵  
曲禮云燭不見跋是也○禮記云庭燎之百由齊桓公  
始也注庭燎之差公蓋五十侯伯子男三十疏云此數  
出大戴記也百者皇氏云作百炬列于庭或云百炬共  
一束也○國語單子云敵國賓至甸人積薪火師監燎  
○禮書云在手曰燭在地曰燎

晨

說文云早昧爽也從臼從辰辰時也亦聲夙夕為夙白辰為晨皆全意○釋名云晨伸也旦而日光復似見也

沔水篇

朝

曲禮曰天子當依而立諸侯北面而見天子曰覲天子當宁而立諸公東面諸侯西面曰朝注云諸侯春見曰朝受贄於朝受享於廟生氣文也秋覲曰覲一受之於

廟殺氣質也朝者位于內朝而序進覲者位于廟門外而序入王南面立于依宇而受焉夏宗依春冬遇依秋王制云諸侯之於天子比年一小聘三年一大聘五年一朝又云天子無事與諸侯相見曰朝考禮正刑一德以尊于天子○周禮太宰大朝覲會同贊玉幣玉獻玉几玉爵宰夫凡朝覲會同以牢禮之法掌其牢禮幕人朝覲會同共帷幕幄帟綬掌次朝覲會同張次小次大宗伯春見曰朝注云朝朝也欲其來之早又云朝覲



會同則為上相司几筵大朝覲王位設黼扆筵席玉几  
典瑞云侯伯執圭子男執璧以朝覲宗遇會同于王小  
臣朝覲沃王盥齊僕朝覲宗遇饗食皆乘金路各以其  
等為車送逆之節大司寇朝覲會同前王大行人春朝  
諸侯以圖天下之事凡諸侯之邦交歲相朝也○孟子  
曰諸侯朝於天子曰述職述職者述所職也一不朝則  
貶其爵再不朝則削其地三不朝則六師移之

宗

大宗伯云夏見曰宗注云宗尊也欲其尊王○大行人云夏宗以陳天下之謨

# 海

釋名云海晦也主承穢濁其色黑如晦也○說文云海天池也以吐納百川者○公羊傳云河海潤千里○春秋攷異郵云黃星騁海水躍宋均云黃星土精土安靜躍則失常○山海經云大荒中有山曰天臺海水入焉○莊子云天下之水莫大於海萬川歸之不知何時止

而不盈尾閭洩之不知何時已而不虛春秋不變水旱  
不知○晏子云海深十里○博物志云天地四方皆海  
水相通地在其中蓋無幾也七戎六蠻九夷八狄形類  
不同總謂四海言皆近于海也○初學記云東海之別  
有渤海故東海共稱渤海又通謂之滄海山海經有岐  
海幼海少海凡四海通謂裨海裨海外復有大瀛海環  
之海神曰海若海中山曰島海中洲曰嶼○渤海圖論  
云海者百谷之王也山東三面瀕海登萊二府島嶼環

抱其在青濟則樂安日照濱州利津霑化海豐諸境皆  
抵海為界稱渤海云○留青日札云東海南海易窮漢  
使東道極于黑齒國南道極于烏弋山離國此亦當是  
西南也烏弋山離去長安萬二千二百里行可百餘日  
乃至條支國臨西海又乘水西行可百餘日近日所入  
云于闐水西流注西海其東水東流注鹽澤河源出焉  
康居去長安萬二千三百里其西北可二千里有奄蔡  
國臨大澤無涯蓋北海云

鶴鳴篇

鶴

春秋說題詞云鶴知夜半注鶴水鳥也夜半水位感其  
生氣則喜而鳴○通卦驗云立夏清風至而鶴鳴○周  
易曰鳴鶴在陰其子和之○詩義疏云鶴大如鵝長脚  
青黑高三尺餘喙長四寸餘多純白或有蒼色者今人  
謂之赤頰常夜半鳴其鳴高亮聞八九里雌一作老者聲  
差下鷄鳴時亦鳴○風土記云鳴鶴戒露白鶴也此鳥

性警至八月白露降即高鳴相警○相鶴經云鶴陽鳥而遊於陰因金氣依火精以自養食於水故喙長軒於前故後趾短棲陸故足高而尾凋翔雲故毛豐而肉疎大喉以吐故修頸以納新故壽體無青黃二色者木土之氣內養故不表於外行必依洲嶼止不集林木蓋羽族之宗長仙人之騏驎也鶴之上相瘦頭朱頂露眼黑睛高鼻短喙喙頰髀耳長頸促身燕膺鳳翼雀毛龜背翳腹軒前垂後高脰麓節洪髀纖指此相之備者也鳴

則聞于天飛一舉千里鶴二年落子毛易黑點三年產  
伏復七年羽翮具復七年飛薄雲漢復七年舞應節復  
七年十二時鳴中律復百六十年不食生物大毛落茸  
毛生雪白或純黑泥水不污復百六十年雌雄相見目  
精不轉而孕千六百年飲而不食鸞鳳為羣○禽經云  
鶴老則聲下而不能高近而不能祭又云鶴愛陰而惡  
陽聲交而孕又云鶴以怨望以潔嘔○古今注云千載  
變蒼又千歲變黑所謂玄鶴○玉策記云千歲之鶴隨

時而鳴能登木色純白腦盡成骨其未千歲者終不集于林也○本草云鶴有玄有黃有白有蒼○雲嶠類要云鶴胎生者形體堅小惟食稻粱雖甚馴久須飛去鶴合而卵生其體大食魚鰕噉蛇鼠不能去耳○埤雅云鶴雌雄相隨履跡而孕內典曰鶴影生○雅翼云鶴性好陰故謂其羽為陰羽周書曰陰羽鳬旌也古書多言鵠即鶴音之轉鵠不日浴而白白即鶴也鵠鳴咕咕咕咕鶴也以龜龍鴻鵠為壽壽亦鶴也



臯

傳云臯澤也○箋云澤中水溢出所為坎○韓詩說云九臯九折之澤○楚辭注云澤曲曰臯

淵

說文云淵回水也○管子云水出地而不流者命之曰淵○李蕭遠云水通之斯為川塞之斯為淵○荀子曰積水成淵蛟龍生焉○列子云鯢旋之潘為淵止水之潘為淵流水之潘為淵濫水之潘為淵沃水之潘為淵

沅水之潘為淵雍水之潘為淵汧水之潘為淵肥水之潘為淵是為九淵焉

錯

說文作厝云厲石也○傳云可以琢玉○嚴氏云揚子不礮不錯焉攸用錯謂治玉也○尚書豫州錫貢磬錯注云治玉石曰錯

穀

廣雅云穀楮也○陸疏云幽州人謂之穀桑荆揚交廣

謂之穀中州人謂之楮殷中宗時桑穀共生是也今江南人績其皮以為布又擣以為紙謂之穀皮紙潔白光澤其裏甚好葉初生可以為茹○管子云五位之土其柞其穀○酉陽雜俎云構穀田久廢必生構葉有瓣曰楮無曰構○本草圖經云楮有二種一種有斑花文謂之斑穀今人用為冠一種皮無花但葉似葡萄作瓣而有子者為佳其實初夏生如彈丸青綠色至六七月漸深紅色乃成熟八月九月採○抱朴子云桴實赤者餌

之一年老者還少○物類相感志云其膠可團丹砂○  
埤雅云楮宜澗谷○雅翼云穀惡木易生實赤如楊梅  
而無核

祈父篇

祈父

傳云圻父司馬也職掌封圻之兵甲○書云圻父薄違  
蔡氏云圻父逼逐違命者也又云司馬掌邦政統六師  
平邦國○周禮云大司馬掌建邦國之九法以佐王平

邦國以九伐之法正邦國以九畿之籍施邦國之政職  
中春教振旅中夏教養舍中秋教治兵中冬教大閱若  
大師則掌其戒令及戰巡陳眡事而賞罰若師有功則  
左執律右執鉞以先愷樂獻于社○小宰云夏官其屬  
六十○記王制云司馬辨論官材論進士之賢者以告  
于王○家語云司馬之官以成聖賢能而失官爵功勞  
而失賞祿士卒疲怨兵弱不用曰不平不平則飭司馬

爪

說文曰覆手曰爪○釋名云爪紹也筋極為爪紹續指端

爪士

箋云司右主勇力之士為王閑守之衛○周禮司右掌羣右之政令凡軍旅會同合其車之卒伍而比其乘屬其右凡國之勇力之士能用五兵者屬焉虎賁氏下大夫二人虎士八百人掌先後王而趨以卒伍軍旅會同亦如之舍則守王閑王在國則守王宮國有大故則守

王門○孔疏云司右與虎賁氏俱率其屬以衛王○禮書云古之守衛王宮者不特士庶子而已有虎賁之虎士司隸之五隸司戈盾軍旅會同授旅賁及虎士戈盾則王之在國在野可謂嚴矣必使四夷之隸者以著王之所守在四夷也或使師氏之屬師之者以著王之使武以文也

饗

說文熟食也○周禮內饗外饗鄭云饗割烹煎和之稱

○儀禮雍人概鼎匕俎于雍爨注云雍人掌割烹之事者

白駒篇

藿

說文藿亦之少也○公食禮云鉶芼牛藿注云藿豆葉也

黃鳥篇

栗



說文云粟嘉穀實也粟之為言續也○周禮云倉人掌粟入之藏○春秋說題辭云粟助陽扶性一變而以陽生為苗二變而秀為禾三變而粲然謂之粟四變入臼米出甲五變而烝飯可食陽以一立為法故粟積一大分穗長一尺西者金所立米者陽精故西字合米而為粟○呂氏春秋曰飯之美者不周之粟○羅氏云古不以粟為穀之名但米之有孚殼者皆稱粟今人以穀之最細而圓者為粟則粱是其類○仁山金氏云呂氏書

說有穀曰粟無穀曰米按粟即所謂穀也古人米與穀  
兼積米切用而易腐穀氣全而可久緩急兼儲後世軍  
儲獨以米故久即不可食○本草粟米味鹹主養腎氣  
去脾胃中熱益氣陳者味苦主胃熱消渴利小便唐本  
注云粟類多種而並細於諸梁北土常食與梁有別

明

箋云明當為盟信也○禮記曰約信曰誓涖牲曰盟○  
周禮司盟掌盟載之法凡邦國有疑會同則掌其盟約

之載及其禮儀北面詔明神既盟則貳之盟萬民之犯命者詛其不信者亦如之注云盟者書其辭於策殺牲取血坎其牲加書於上而埋之謂之載書有疑不協也明神日月山川覲禮加方明於壇上所以依之也詔之者讀載書以告貳之者寫副當以授六官盟詛者欲相與共惡之也又玉府若合諸侯則共珠槃玉敦戎右盟則以玉敦辟盟遂役之贊牛耳桃茢封人大盟飾牛牲詛祝作盟詛之載辭司寇凡邦之大盟約泣其盟書而

登之于天府太史內史司會及六官皆受其貳而藏之  
○左傳子貢曰盟有玉帛以奉之

諸兄

爾雅云男子先生為兄後生為弟族父之子相謂為族  
兄弟族兄弟之子相謂為親同姓兄之子弟之子相謂  
為從父昆弟

諸父

爾雅云父為考父之考為王父父之世父叔父為從祖

祖父父之舅弟先生為世父後生為叔父父之從父舅弟為從祖父父之從祖舅弟為族父

按諸之訓衆也則諸父諸兄當合三族而言箋傳義非也

我行其野篇

遂

箋云牛薺也仲春時生可采○爾雅云藟牛薺郭云今江東呼草為牛薺者高尺餘許方莖葉長而銳有穗穗

間有華華紫縹色可淋以為飲疏縹青白色淋以水沃也○陸璣云今人謂之羊蹄似蘆菔而葉長赤鬻為茹滑美○本草羊蹄一名東方宿一名連蟲陸一名鬼目一名蓄陶隱居云今人呼禿菜即蓄音之訛詩云言采其蓄圖經云生下濕地春生苗高三四尺葉狹長頗似萵苣而色深莖節間紫赤花青白成穗子三稜若芡蔚夏中即枯根似牛蒡而堅實衍義云葉如菜中菠薐但無歧而色差青白葉厚花與子亦相似

按箋云遂牛薺爾雅云藟牛薺則遂即是藟孔疏云釋草無文非也孫炎注爾雅云車前草一名牛薺考車前草本草有五名並不云牛薺孫說誤矣

藟

箋云藟亦仲春時生可采○爾雅云藟藟郭云大葉白華根如指正白可啖又云藟藟茅疏藟與藟茅一草也華白者即名藟華赤者別名藟茅○廣雅云烏楚藟也○陸璣曰河內謂之藟幽州謂之藟燕一名藟其根正

白宜著熱灰中溫噉之饑歲可烝茹以禦饑或云花葉  
有兩種一種葉細而花赤一種葉大而花白復香○風  
土記云菑蔓生被樹而升紫黃色大如牛角二三同蒂  
長七八尺甜味如蜜

按陸幾所言花赤者即是萑茅也風土記所云恐別  
是一物遂菑毛公並謂之惡菜然遂堪入藥用菑花  
白而香根可茹未必惡菜也



六家詩名物疏卷三十六

欽定四庫全書

經部

六家詩名物疏卷三十七

詳校官監察御史臣沈孫璉

通政使司副使臣莫瞻菴覆勘

總校官中書臣朱鈐

校對官中書臣吳俊

謄錄監生臣劉宗望

欽定四庫全書

六家詩名物疏卷三十七

明 馮復京 撰

小雅鴻雁之什二

斯干篇

似

箋云似讀如已午之已疏古者似已字同○爾雅云太歲在巳曰大荒落○史記云巳者言陽氣之巳盡也○漢書云巳藏於巳

妣

爾雅云母為妣○廣雅云妣媿也媿匹於父○周禮大司樂奏夷則歌小呂舞大濩以享先妣注先妣姜嫄也姜嫄履大人跡感神靈而生后稷是周之先母也周立廟自后稷為始祖姜嫄無所妃是以特立廟祀之謂之

閼宮

祖

釋名云祖祫也祫物先也○大司樂奏無射歌夾鍾舞

大武以享先祖注先祖謂先王先公

棘

疏云矢鏃之角為棘古有此名○韓詩作枋枋隅也

革

傳云翼也○韓詩作翺翺翅也

翬

爾雅云伊洛而南素質五色皆備成章曰翬

楹

廣雅云楹謂之柱○釋名云楹亭也亭亭然孤立旁無所依也齊魯讀曰輕輕勝也孤立獨處能勝任上重也○穀梁傳曰丹桓宮楹禮天子丹諸侯黝大夫蒼○書大傳曰士大夫有石材庶人有石承注云材柱下質也承當柱下而已不出下為飾

正

箋云正晝也○朱傳云向明之處○呂氏曰正謂正寢

冥

互見名南牖

箋云冥夜也○朱傳云奧窔之間○爾雅云西南隅謂之奧東南隅謂之窔孫炎曰奧室中隱奧之處也郭璞曰窔亦隱闇○釋名云奧不見戶明所在秘奧也窔幽也亦取幽冥也

莞

詳見邶風席

爾雅云莞苻離其上菑注今西方人呼蒲為莞蒲菑謂其頭臺首也今江東謂之苻離又云葦鼠莞注亦莞屬也纖細似龍須可以為席蜀中出好者○釋文曰草叢

生水中莖圓江南以為席形似小蒲而實非也○廣雅  
曰慈蒲莞也○箋云莞小蒲之席○濮氏曰莞又云燈  
心草生池澤中即苻離也○本草燈心草叢生莖圓細  
而長直人將為席

簟

箋云竹葦曰簟○釋名云簟簟也布之簟簟然平正也  
○說文云簟竹席也○方言云簟宋魏謂之笙或謂蘧  
苗關西謂之簟或謂之荈其麓者謂之蘧條關東或謂



之簋掞○禮曰莞簟之安縗結之尚○淮南子云席上之先萑簟樽之上玄樽先王貴之先本而後末

按司几筵有次席注以為桃枝竹所次成者其即此簟與莞席在下即筵也竹簟在上即重席也孔氏曰寢卧之席自天子以下宜莞簟同

### 寢

周禮宮人掌王之六寢之修注六寢者路寢一小寢五路寢以視事小寢以時燕息焉又司士居虎門之左司

王朝注虎門路寢門也王日視朝於路寢門外大僕建路鼓于大寢之門外而掌其政○禮記寢不踰廟又云朝辨色始入君日出而視之退適路寢聽政使人視大夫大夫退然後適小寢釋服又云路寢成則考之○鄭康成詩禮注云君謂之路寢大夫謂之適寢士或謂之適室世婦以君下寢之上為適寢內子卿之妻也下室其燕處也天子之寢有左右房宗廟及路寢制如明堂每室四戶○孔仲達云天子路寢制如明堂燕寢如諸

侯路寢故有左右房○何休云天子諸侯皆有二寢一  
曰高寢一曰路寢一曰小寢父居高寢子居路寢孫從  
王父母妻從夫寢夫人居小寢○爾雅云室有東西廂  
曰廟無東西廂有室曰寢○禮書云以書攷之天子路  
寢之制室居中左戶右牖東西有房又有東序西序東  
堂西堂東垂西垂賓階阼階房之南有東西夾室鄭康  
成釋儀禮謂房當夾室北是也孔安國謂西房西夾室  
東房東夾室誤矣諸侯路寢與大夫士之室皆東西房

鄭氏謂大夫士無西房誤矣王六寢后六宮諸侯三寢夫人三宮王大寢一小寢五諸侯大寢一小寢二大寢在前謂之路寢又謂正寢小寢在後謂之燕寢又謂少寢自卿以下二寢正寢居前燕寢居後其妻二寢亦如之

熊

說文云熊獸似豕山居冬蟄○詩義疏云熊能攀援上高樹見人則顛倒投地而下冬入穴蟄始春而出○援

神契云赤熊見則姦宄自遠○淮南子注云熊食鹽而死○抱朴子云熊壽五百歲能化為狐狸○異苑云熊藏山穴穴裏不得見穢及傷殘見則舍穴自死○續搜神記云熊無穴或居大樹孔中東土呼熊為子路以物擊樹云子路可起於是便下不呼則不動也○陶隱居云熊白是背上膏寒月則有夏月則無○圖經云熊形類犬豕而性輕捷○酉陽雜俎云熊膽春在首夏在腹秋在左足冬在右足○墨客揮犀云熊於山中行數十

里悉有跼伏之所必在危崑枯木中山民謂之熊館○  
埤雅云熊似豕堅中當心有白脂如玉味甚美俗呼熊  
白好舉木而引氣謂之熊經冬蟄不食饑則自舐其掌  
故其美在掌鬼谷子曰分威法伏熊說者以為熊之擊  
搏先伏而後動○字說云熊強毅有所堪能而可以其  
物火之羆亦熊類而又強焉然可罔也○雅翼云熊人  
足黑色革厚筋駕獵者刺其革不可得入隨有膏膜之

羆

爾雅云羆如熊黃白文郭云似熊而長頭高脚猛慙多  
力能拔樹木關西呼曰貍羆○詩義疏云有黃羆有赤  
羆大於熊其脂如熊白而麕理不如熊白美○禹貢云  
梁州厥貢熊羆狐狸織皮○山海經云嶓冢之山其獸  
多羆○埤雅云羆似熊而大堅中從目能緣能立遇人  
則攀而攫之淮南子曰熊羆之動以攫搏是也其白生  
於心之下育之上秋冬則有春夏則無○爾雅翼云獵  
者云羆熊之雌者力尤猛柳宗元稱鹿畏羆羆畏虎

畏羆羆之狀被髮人立絕有力而甚害人周禮穴氏掌  
攻蟄獸各以其物火之謂熊羆之屬

虺

爾雅蝮虺博三寸首大如擘舍人曰江淮以南曰蝮江  
淮以北曰虺孫炎曰有牙最毒郭曰此自一種蛇名為  
蝮虺邢昺曰今蛇細頸大頭色如文綬文間有毛似豬  
鬣鼻上有針大者長七八尺一名反鼻如虺類足以明  
此自一種蛇○廣雅云虺蝮也○廣志云蝮蛇與土色



相亂長三四尺其中人以牙櫟之裁斷皮出血則身盡  
痛九竅出血而死○述異記云虺五百年化為蛟○埤雅  
云虺狀似蛇而小傳曰為虺弗摧為蛇奈何以此故也  
虺一名蝮舊曰蝮蛇怒時毒在頭尾一曰虺與蝮異虺  
如土色所在有之蝮蛇鼻反在上有針錦文衆蛇之中  
此獨胎產生輒坼剖母腹亦有與地同色者○陶隱居  
云蝮形短而扁○陳藏器云蝮著足斷足著手斷手不  
爾合身糜潰七八月毒盛時嚙樹以泄其氣樹便死又

吐涎沫於艸木上著人身腫成瘡○圖經云蝮蛇黃黑色黃頷尖口○張文仲云蝮蛇頭斑身赤斑亦有青黑色者○葛洪云青蝮蛇綠色大者四五尺一種尾三四寸

蛇

爾雅云騰螭蛇蟒王蛇○周易云龍蛇之蟄以存身也○左傳云深山大澤實生龍蛇○星經云騰蛇二十二星在室北近河主蟲蛇○埤雅云魚屬連行蛇屬紆行

盤常向壬地以耳聽○雅翼云蛇艸居常饑得食稍飽輒蛻殼冬含土入蟄及春出蟄則吐之其圓重如錫石謂之蛇黃種類至多惟烏蛇性善不噬物而白花蛇有毒生於蘄州今蛇死目皆閉惟蘄州者目開若生舒蘄兩界間者則一開一閉此理之不可曉者○陶隱居云蛇皆有足五月五日取燒地令熱以酒沃之置中足出按蛇類至多爾雅所載惟蜃蟻蝮三者本艸有白花蛇烏蛇金蛇銀蛇蛇婆藍蛇兩頭蛇山海經有肥

遺六足四翼有巴蛇吞象三年而出其骨有長蛇毛  
如虺有鳴蛇四翼音如磬神異經有率然孫武子以  
譬善用兵者也顧渚山記有綠蛇朝野僉載有報冤  
蛇嶺表錄異楊氏南裔異物志諸書俱有蚺蛇錄異  
記有雞冠蛇爆身蛇黃領蛇寰宇記有鈎蛇窮神秘  
苑有自斷蛇及諸方志所錄不可勝記本毒蟲有無  
毒者本鱗蟲有無鱗者惟黃喉蛇一種善啖蝮額有  
大王字為衆蛇之長

大人

朱傳云太卜之屬占夢之官也○周禮太卜掌三夢之法一曰致夢二曰觴夢三曰咸陟其經運十其別九十以龜之八命釐三夢之占占夢掌其歲時觀天地之會辨陰陽之氣以日月星辰占六夢之吉凶一曰正夢二曰噩夢三曰思夢四曰寤夢五曰喜夢六曰懼夢季冬聘王夢獻吉夢于王王拜而受之乃舍萌于四方以贈惡夢

男

說文丈夫也从田从力○易云乾道成男坤道成女○射義云天地四方者男子之所有事也○本命解云男子者任天道而長萬物者也女子者順男子之教而長其理者也○釋名云男任也典任事也

璋

周禮大宗伯以赤璋禮南方注半圭曰璋典瑞璋繅二采一就以頽聘玉人大璋中璋九寸邊璋七寸射四寸

厚寸黃金勺青金外朱中鼻寸衡四寸有縹天子以巡  
狩宗祝以前馬大璋亦如之諸侯以聘女嫁圭璋八寸  
以頤聘牙璋中璋七寸射二寸厚寸以起軍旅以治兵  
守璋邸射素功以祀山川以致稍餽○禮記云灌以圭  
璋用玉氣也又云君執圭瓚裸尸大宗執璋瓚亞裸又  
聘義云致饗餽還圭璋○聘禮云聘于夫人用璋覲禮  
云方明者木也南方璋○左傳蒍啓疆云朝聘有珪享  
頤有璋○爾雅云璋大八寸謂之珣

地

說文云元氣初分輕清為天重濁為地萬物所陳列也  
徐曰地者地也地而高也山嶽丘陵墳衍地而卑也臯  
隰汚潢故曰地有二形高下平也○爾雅云東至泰遠  
西至邠國南至濮鈐北至祝栗謂之四極孤竹北戶西  
王母日下謂之四荒九夷八狄七戎六蠻謂之四海距  
齊州以南載日為丹穴北載斗極為空同東至日所出  
為太平西至日所入為太蒙○易曰至哉坤元萬物資



生乃順承天坤厚載物德合無疆含弘光大品物咸亨  
又云立地之道曰柔與剛又云在地成形○考靈耀云  
地有四游冬至地上行北而西三萬里夏至地下行南  
而東三萬里春秋二分是其中矣地常動移而人不知  
譬如人在大舟中閉牖而坐舟行不覺也○元命包云  
地者易也言養物懷仁交易變化含吐應節故其立字  
土力於一者為地又云地所以右轉者氣濁精少含陰  
而起遲故轉右迎天佐其道○春秋說題辭云地之為

言婉也承天行其義也山陵之大非地不制含功以牧  
生也○援神契云地順受澤謙虛開張含泉任萌滋物  
歸中○括地象云八極之廣東西二億三萬三千里南  
北二億三萬一千五百里夏禹所治四海內地東西二  
萬八千里南北二萬六千里○素問云積陰為地故地  
者濁陰也○家語子夏云商聞山書曰地東西為緯南  
北為經山為積德川為積刑高者為生下者為死丘陵  
為牡谿谷為牝○國語云陽伏而不能出陰遁而不能

烝於是。有地震。○管子云。地者萬物之本原。諸生之根  
苑。○白虎通云。地者元氣所生萬物之祖也。地之言施  
也。諦也。應施變化。審諦不誤。敬始重終。故謂之地也。○  
物理論云。地者底也。底之言著也。陰體下著也。其神曰  
祗。祗成也。育生萬物備成也。西北高而東南下。東西長  
南北短。其盡四海者也。炎氣鬱烝。景風盪物。地之張也。  
秋風蕩生。涼氣肅然。地之閉也。

楊

說文襦褌也詩曰載衣之褌○正義云褌縛兒被也侯  
苞云示之方也明褌制方

瓦

傳云瓦紡塼也箋云習所有事○古史考云夏世昆吾  
氏作屋瓦烏曹氏作甑○物原云伏羲始以茨覆屋禹  
作土塼石甃桀臣昆吾作甑瓦舜作牆周公作壁○朱  
子云瓦紡時所用之物舊見人畫列女傳漆室女如今  
銀子樣者意其為紡甑也

無羊篇

牦

爾雅云黑肩牦注毛詩傳曰黃牛黑肩此宜通謂黑肩牛爾雅又云牛七尺為牦

蓑

傳云蓑所以備雨○說文云艸雨衣也○公羊傳不蓑城也注若今以艸衣城○韻會注云秦謂之草○國語身衣襜褕注云蓑辟衣也

笠

疏云笠原以禦暑兼可禦雨○說文云笠無柄也○增韻云有柄曰簦無柄曰笠○國語云蓑笠時雨既至必求之又云首戴茅蒲注云簦笠也

牲

周禮庖人掌共六畜注云始養之曰畜將用之曰牲又膳夫膳用六牲注云六牲馬牛羊豕犬雞也閭師民不畜者祭無牲牧人掌牧六牲而阜蕃其物以共祭祀之

牲拴凡陽祀用騂牲毛之陰祀用黝牲毛之望祀各以其方之色牲毛之凡時事之牲必用拴物凡外事毀事用尨可也凡祭祀共其犧牲以授充人繫之凡牲不繫者共奉之牛人掌養國之公牛以待國之政令充人掌繫祭祀之牲拴小宗伯毛六牲而頒之于五官使共奉之雞人掌共雞牲辨其物羊人掌羊牲校人掌王馬之政牧師掌牧地皆有厲禁而頒之孟春焚牧中春通淫掌其政令凡田事贊焚萊廩人掌十二閑之政教圉師

掌教圉人養馬圉人掌養馬芻牧之事以役圉師犬人祭祀共犬牲用牲物伏瘞亦如之○禮記云犧牲不粥于市又云仲秋之月乃命宰祝循行犧牲視全具按芻豢瞻肥瘠察物色必比類量小大視長短皆中度五者備當上帝其饗又云帝牛必在滌三月稷牛惟具所以別事天神與人鬼也又云古者天子諸侯必有養獸之官名牛納而視之擇其毛而卜之吉然後養之君皮弁素積朔月月半君巡牲所以致力也○左傳云牛卜日



曰牲又云五牲不相為用注牛羊豕犬雞又云為六畜  
五牲三犧以奉五味注六畜馬牛羊雞犬豕五牲麋鹿  
麋狼兔祭天地宗廟三者謂之犧服虔云三犧雁鶩鷄  
也○國語云天子祀以會諸侯太牢卿特牛大夫少牢  
士特牲

蒸

箋云麓曰薪細曰蒸

肱

傳云肱臂也

牧人

詳見牲

周禮牧人下士六人府一人史二人徒二十人注牧人  
犧牲於野田者

六家詩名物疏卷三十七

欽定四庫全書

六家詩名物疏卷三十八 明 馮復京 撰

小雅節南山之什一

節南山篇

師

尚書云立太師太傅太保茲惟三公論道經邦燮理陰陽官不必備惟其人○大戴禮云天子不論先聖王之德不知君國畜民之道不見禮義之正不察應事之理

不博古之典傳不開威儀之數詩書禮樂無經學業不  
法凡是其屬太師之任也○賈誼云師道之教訓○宋  
書曰三公訓護人主導以德義天子加拜待以不臣之  
禮非人則闕

尹

春秋隱三年夏四月尹氏卒公羊傳云尹氏者何天子  
之大夫也其稱尹氏何貶曷為貶譏世卿世卿非禮也  
○崧高箋云尹官氏○路史云子朝入尹周地尹氏采

杜謂鞏西南偃師今汾州有吉甫墓記即其邑

按偃師今屬河南府汾州平遙縣治東有尹吉甫墓

### 昊天

爾雅夏為昊天邢氏云元氣博大之貌○尚書歐陽說  
云春曰昊天○鄭玄云堯典羲和以昊天總敕以四時  
故知昊天不獨春也○呂氏春秋云西方昊天○埤雅  
云夏曰昊天昊天者大以明與玄天反

### 亞

爾雅云兩壻相謂為亞郭璞云今江東人呼同門為僚壻○釋名云兩壻相謂為亞者言每一人取姊一人取妹相亞次也又並來女氏則姊夫在前妹夫在後亦相亞也

家

朱傳云家氏○左傳桓公八年天王使家父來聘杜氏云家氏父字何休公羊注云家采地父字也范甯穀梁注云家父天子大夫家氏父字○古今姓纂云家姓京

兆周大夫家父之後

正月篇

正月

箋云夏之四月建巳之月純陽用事○左傳曰正月朔  
慝未作○孔氏云以易爻卦言之從建子之後每月一  
陽息一陰消至四月建巳六陰消盡六陽並盛是為純  
乾之卦正陽之月也從建午之後每月一陰息一陽消  
至十月建亥六陽消盡六陰並盛是為純坤之卦正陰

之月也

臣僕

傳曰古者有罪不入于刑則役之園土以為臣僕○周禮云大司寇以園土聚教罷民凡害人者置之園土而施職事焉以明刑恥之其能改者反于中國不齒三年司圜掌收教罷民凡害人者弗使冠飾而加明刑焉任之以事而收教之能改者上罪三年而舍中罪二年而舍下罪一年而舍其不能改而出園土者殺○孔氏云



古者罪有等級重者入于肉刑輕者役于園土晝則役之夜入園土當役之時為臣僕之事故號之為臣僕○箋云人有十等僕第九言罪及家之賤者○白虎通云臣者堅也屬志自堅固○廣雅云臣繕也○孝經云不敢失于臣妾○左傳云人有十等王臣公公臣大夫大夫臣士士臣皁皁臣輿輿臣隸隸臣僚僚臣僕僕臣臺朱傳云亡國所虜亦為臣僕○書箕子云商其淪喪我罔為臣僕

占夢

詳見大人

周禮春官占夢中士二人

蜴

爾雅云蝾螈蜥蜴蜥蜴蜥蜴守宮也疏一物四名  
○說文云榮蜥蜴醫以注鳴者也在壁曰蜥蜴在草曰  
蜥蜴蜥蜴蜥蜴守宮也○方言云秦晉西夏謂之守宮  
或謂之蠃螈或謂之蜥易在澤中謂之易蜴南楚謂蛇  
醫或謂蝾螈東徐海岱謂之蠃螈北燕謂之祝蜴桂林

之中守宮大而能鳴謂之蛤解注蜚易南陽呼蠃蜥蜥  
蜥斯侯二音似蜚易大而有鱗今所在通言蛇醫蛤解  
似蛇醫而短身有鱗采江東呼蛤蜊○詩義疏云蜥一  
名蠃蜥水蜥也或謂之號蜥蛇醫如蜥蜴青綠色大如  
指形狀可惡○本艸石龍子一名蜚蜥一名山龍子一  
名守宮一名石蜥生平陽川谷及荆山石間陶隱居云  
其類有四種大形純黃色為蛇蜥次似蛇蜥小形長尾  
見人不動名龍子次有小形五色尾青碧可愛名蜚蜥

不螫人一種喜緣籬壁名蠅蜒形小而黑乃言螫人必死而未嘗中人唐本注云蛇師生山谷頭大尾短小青黃或白斑者是蠅蜒似蛇師不生山谷在人家壁間名守宮又名螫虎其名龍子及五色者螫蜴耳形皆細長尾與身相類似蛇四足○古今注云蠅蜒一曰守宮一曰龍子善於樹上捕蟬食之其長細五色者名蜴蜴其短大者名蠅螬一曰蛇螫大者長三尺色玄紺善魅人一曰玄螬一曰綠螬○考異郵云土勝水故守宮食蠅○

東方朔射守宮云以為龍又無角謂之為蛇又有足跂  
跂脉脉善緣壁若非守宮即蜚蜴○博物志云蜚蜴或  
蠃蜴以器養之食以朱砂體盡赤所食滿七斤擣萬杵  
以點女人支體終身不滅偶則落故號守宮○箋云虺  
蜴之性見人則走○三教珠英云守宮鱗色如蛇而四  
足亦與魚合○埤雅云易十二時變色故曰易也舊說  
蜚易吐電蛇體有傷銜草傳之故有蛇醫之號考工記  
注云胸鳴榮原屬馬融周官作以胃鳴干寶周官作以

骨鳴○詩詁云守宮蜃蜴二物蜃蜴尾通于身如蛇而加足有黑色者有青綠色者常居草間守宮褐色四足有尾偃伏壁間故名蜃蜴亦謂守宮

燎

傳云火田為燎

宗周

書多方王來自奄至于宗周周官歸于宗周○說文鎬武王所都在長安西上林苑中○地里志初維邑與宗

周通封畿東西長而南北短短長相覆為千里○孔氏  
曰正月云赫赫宗周謂鎬京也後平王居洛邑亦謂洛  
邑為宗周祭統云即宮于宗周謂洛邑也○呂氏云王  
者天下之所宗宗周初無定名隨所都而名耳

褒

水經注褒水又南逕褒縣故城東褒中縣也本褒國又  
南流入于漢南鄭縣故褒之附庸周顯王之世蜀有褒  
漢之地至六國楚人兼之懷王衰弱秦略取焉○一統

志陝西漢中府褒城縣在府城西北四十五里古褒國  
漢置褒中縣以地在褒谷中故名古褒城在褒城縣境  
內○鄭語云宣王之時有童謠曰檠弧箕服實亡周國  
宣王聞之有夫婦鬻是器者王使執而戮之府之小妾  
生女而非王子也懼而弃之此人也收以奔褒褒人褒  
姁有獄而以為女入于王王嬖是女使至于亂國

姁

禮緯云禹祖以吞薏苡生故姓姁氏○國都城記云褒



國如姓夏同姓所封

輔

孔氏云輔是可解脫之物如今人縛杖于輻以防輔車也

穀

說文肴啖也徐鍇曰謂已修庖之可食也○釋文云熟肉有骨曰穀大鬻曰馘○曲禮云進食之禮左穀右馘○箋云凡非穀而食之曰穀

鄰

周禮遂人五家為鄰五鄰為里四里為鄣五鄣為鄙五鄙為縣五縣為遂鄰長五家則一人掌相糾相受凡邑中之政相贊徙于他邑則從而授之○左傳晏子云非宅是卜惟鄰是卜○通鑑外紀云黃帝以井一為鄰鄰二為朋○晉書云堯制八家為鄰三鄰為朋○合璧事類云周禮大司徒曰五家為比遂人曰五家為鄰考之則在郊內者謂之比在郊外者謂之鄰釋文皆訓為近

鄭玄云異其名者示相變耳

十月之交篇

朔

釋名云朔月初之名也朔蘇也月死復蘇生也

辛

爾雅太歲在辛曰重光○史記云辛者言萬物之辛生  
○漢書云悉新於辛○釋名云辛新也物初新者皆有  
収成也○推度災云辛者正秋之王氣

卯

爾雅太歲在卯曰單闕○史記云卯之為言茂也言萬物茂也○漢書云茂莠於卯○說文云卯冒也二月萬物冒地而出象開門之形故二月為天門○推度災云卯者正春之臣位

日食

釋名云日月虧曰食稍稍侵虧如蟲食草木葉也○周禮膳夫天地有裁則不舉太司樂日月食令去樂庭氏

救日之弓救月之矢注云日食射太陰月食射太陽○  
曾子問孔子云諸侯旅見天子諸侯相見日食廢大夫  
之祭日食廢昏義云男教不修陽事不得謫見于天日  
為之蝕故日蝕則天子素服而修六官之職蕩天子之  
陽事○書云乃季秋月朔辰弗集于房瞽奏鼓嗇夫馳  
庶人走○左傳士文伯云國無政不用善則自取謫于  
日月之災故政不可不慎也務三而已一曰擇人二曰  
因民三曰從時叔孫昭子云日有食之天子不舉伐鼓

于社諸侯用幣于社伐鼓于朝○公羊傳云日有食之以朱絲縈社○穀梁傳云日有食之何也吐者外壤食者內壤闕然不見其壤有食之者也天子救日置五麾陳五兵五鼓諸侯置三麾陳三兵三鼓大夫擊門士擊柝凡有聲皆陽事也以厭陰氣也○管子云日掌陽陽為德故日食則失德之國惡之聖王日食則修德

按唐書志十月辛卯日食在幽王六年而國語載三川震岐山崩為幽王三年事三川者涇渭汭也即此

詩之百川沸騰也岐山崩即山豕率崩也蓋十月日  
食以前事而詩人追言之

行

箋云行道度也○周髀云周天三百六十五度四分度  
之一日月皆右行于天日日行一度月日行十三度十  
九分度之七○唐一行日議云日行黃道月有九道遇  
交則有薄蝕之變至如合朔如合璧則不食其交不軌  
道則食也

月食

易云月盈則食○禮記云婦順不修陰事不得譎見於  
於天月為之蝕故曰食則后素服而修六宮之職蕩天  
下之陰事○管子云月掌陰陰為刑故月食則失刑之  
國惡之聖人月食則修刑○靈憲云當日之衝光常不  
合是謂闇虛在星則星微遇月則月蝕○荊州占云月  
蝕后自提鼓階前擊鼓者三中良人諸御者宮人皆擊  
柝救之月已食后乃齋服縞素三日不從樂以應其祥



○新唐書歷志云月臣道也遠日益明近日益虧望而正于黃道是謂臣干君明則陽斯蝕之矣朔而正于黃道是謂臣壅君明則陽為之蝕矣

### 電

釋名云電殄也乍見則殄滅也○說文云電陰陽激耀也○易曰離為電雷電合而章○時訓解云春分又五日雷乃發聲又五日始電不始電君無威震○莊子云陰氣伏于黃泉陽氣上通于天陰陽分爭故為電○大

戴禮云陰陽之氣偏則風俱則雷交則電○董仲舒云  
太平之世電不眴目宣示光輝而已○物理論云風清  
熱之氣散為電○易元包云噬嗑列缺搏礧礧灼傳曰  
列缺搏雷之動也礧礧灼電之耀也○埤雅云電從申  
陰陽以申洩而為電故也記曰地載神氣神氣風霆風  
霆流形言萬物以風霆流形而風霆出於地之神氣也

冢

釋山云山頂冢孫炎曰謂山巔也○釋名云冢腫也言

冢起也

萃

釋山云萃者厯屢郭璞曰謂山峰頭巉巖者

卿士

孔氏云六卿之外更為之都官總統六官之事兼祿為名故謂之卿士○朱傳云或曰卿士蓋卿之士周禮太宰之屬有上中下士公羊所謂宰士左氏所謂周公以蔡仲為已卿士是也蓋以宰屬而兼總六官位卑而權

重也○左傳鄭武公莊公為平王卿士注云卿士王卿之執政者○白虎通云卿之為言章善明理也○伊尹曰九卿通寒暑

番聚蹶橈

箋云番聚蹶橈皆氏疏云蓋后氏之外親

按番韓詩作繁漢有御史大夫繁延壽其字音瞞漢又有游俠萬章音與橈同蹶周宣王時有蹶父為卿士蓋貴族也

司徒

尚書云百姓不親五品不遜汝作司徒敬敷五教在寬  
又曰司徒掌邦教敷五典擾兆民○周禮大司徒卿一  
人掌建邦之土地之圖與其人民之數以佐王安擾邦  
國以土會之法辨五地之物生因此五物者民之常而  
施十有二教焉以土宜之法辨十有二土之民物以土  
均之法辨五物九等制天下之地征以土圭之法測土  
深正日景以求地中建王國焉凡建邦國以土圭土其

地而制其域凡造都鄙制其地域而封溝之以荒政十有二聚萬民以保息六養萬民以本俗六安萬民施教法頒職事于邦國都鄙以鄉三物教萬民而賓興之以鄉八刑糾萬民大軍旅大田役以旗致萬民而治其徒庶之政令○禮記云司徒修六禮以節民性明七教以興民德齊八政以防淫一道德以同俗養耆老以致孝恤孤獨以逮不足上賢以崇德簡不肖以紂惡○韓詩外傳云君臣不正人道不和國多盜賊人怨其上則責

之司徒○管子云昔者黃帝得祝融辨南方故使為司徒○家語云司徒之官以成德地宜不殖財物不蕃萬民饑寒教訓不行風俗淫僻人民流散曰危危則飭司徒

宰

箋云冢宰○書云冢宰掌邦治統百官均四海○周禮太宰卿一人掌建邦之六典以佐王治邦國以八法治官府以八則治都鄙以八柄詔王馭羣臣以八統詔王

馭萬民以九職任萬民以九賦斂貨賄以九式均節財  
用以九貢致邦國之用以九兩繫邦國之民作大事則  
戒于百官贊王命王眡朝則贊聽治眡四方之聽朝亦  
如之歲終令百官府各正其治受其會聽其致事而詔  
王廢置三歲則大計羣吏之治而誅賞之○家語云冢  
宰之官以成道官屬不理分職不明法政不一百事失  
紀曰亂亂則飭冢宰○齊職儀云堯命羲和主陰陽之  
職即天官也后稷服事虞夏敬授民時尊稷為天官殷



以其官為冢宰周公在豐為太宰召公又居之

膳夫

周禮天官膳夫上士二人中士四人下士八人掌王之  
食飲膳羞食用六穀膳用六牲飲用六清羞用百二十  
品珍用八物醬用百有二十壘王日一舉鼎十有二物  
皆有俎王齋日三舉大喪大荒大札天地有災邦有大  
故則不舉王燕飲酒則為獻主掌后及世子之膳羞

內史

周禮春官內史中大夫一人掌王之八枋之法爵祿廢  
置殺生予奪執國法及國令之貳以攷政事以逆會計  
掌叙事之法受納訪以詔王聽治凡命諸侯及孤卿大  
夫則策命之凡四方之事書內史讀之王制祿則贊為  
之賞賜亦如之掌書王命○家語子曰天子以內史為  
左右手

趣馬

周禮夏官趣馬下士阜一人掌贊正良馬而齊其飲食

簡其六節掌駕說之頒辨四時之居治以聽馭夫

師氏

周禮地官師氏中大夫一人掌以美詔王以三德教國  
子教三行居虎門之左司王朝掌國中失之事以教國  
子弟凡國之貴游子弟學焉凡祭祀賓客會同喪紀軍  
旅王舉則從聽治亦如之使其屬帥四夷之隸各以其  
兵服守王之門外且蹕朝在野外則守內列

艷妻

魯詩曰閼妻扇方處谷永疏云閼妻驕扇日以不臧師古曰閼嬖寵之族也厲王無道內寵熾盛○班婕妤賦哀閼褻之為郵○中候摘雜貳曰昌受符厲倡嬖期十之世權在相刺者配姬以放賢山崩水潰納小人家伯罔主異載震孔氏曰刺艷古今字以刺對姬刺為其姓

汚

疏云池停水之名禮記曰汚其宮而瀦焉是也

菜

孔氏云田廢生草謂之萊周禮以田易者為萊○遂人注云萊休不耕者

向

孔氏云左傳桓王與鄭十二邑向在其中杜預云河內軹縣西有地名向上則向在東都畿內○水經注云向城北向崗左傳襄十一年諸侯伐鄭師于向○朱傳云都大邑周禮畿內大都方百里小都方五十里皆天子公卿所封也向在東都畿內今孟州河陽縣是也○一

統志向城在河南懷慶府濟源縣西南即周向國

按路史國名紀謂皇父作都之向在沛國龍亢若然則不在東都畿內矣與鄭箋異不可從

三有事

詳見下三事大夫

傳云有司國之三卿疏云太宰云施則於都鄙立其兩注兩謂兩卿明皇父當二卿今立三有事是自同畿外增一卿也

六家詩名物疏卷三十八

欽定四庫全書

經部

六家詩名物疏卷

三十九至  
四十二

詳校官監察御史<sub>臣</sub>沈孫璉

通政使司副使<sub>臣</sub>莫瞻菴覆勘

總校官中書<sub>臣</sub>朱 鈐

校對官中書<sub>臣</sub>吳 俊

謄錄監生<sub>臣</sub>楊兆豐

欽定四庫全書

六家詩名物疏卷三十九

明

馮復京

撰

小雅節南山之什二

雨無正篇

旻天

爾雅秋為旻天李巡曰秋萬物成熟皆有文章故曰旻  
天旻文也郭璞曰旻猶愍也愍萬物彫落○毛傳云仁  
覆閔下則稱旻天



正大夫

箋云正長也長官之大夫○王荊公云周官八職一曰正六官之長是也○周禮宰夫掌百官府之徵令辨其八職一曰正掌官法以治要賈公彥曰正長也六卿下各有屬六十故六卿稱正也云掌官法者掌當官之法也以治要者要謂大計要也

三事大夫

疏云鄭言三公以經三事大夫為三公也○尚書云立

太師太傅太保茲惟三公○周禮曰面三槐三公位  
焉○晉書云三台六星兩兩而居起文昌列抵太微  
一曰天柱三公之位也主開德宣符○鹽鐵論云天  
設三光以照記天子立公卿以明治故曰公卿者四  
海之表儀神化之丹青也○後漢書云三公上則台  
階下象山岳○環濟要略云三公者太師太傅太保  
也師王所尊也傳助王事保保王身也凡此皆內與  
王論道中參六官之事三公者象鼎三足共承其上

也○大戴論曰天子無恩於父母不惠於庶人無禮於大臣不中於制獄無經於百官不哀於喪不敬於祭不信於諸侯不誠於戎事不誠於賞罰不厚於德不强於行不從太師之言凡是之屬太傅之任也天子處位不端受業不敬言語不序聲音不中律進退陞降不以禮俯仰周旋不中節凡此之屬太保之任也

太師  
見前

白虎通云公之為言公正無私也○

朱傳云三事三公也大夫六卿及中下大夫也○周官

太宰大司徒大宗伯大司馬大司寇卿

冬官闕

小宰司會

小司徒州長師氏遂人遂大夫小宗伯大司樂內史小  
司馬戎右大馭戎僕校人職方氏小司寇大行人中大  
夫宰夫太府內宰鄉師黨正保氏司市司門遂師縣正  
廩人肆師冢人墓大夫樂師太師太卜太祝太史內史  
巾車軍司馬射人司士諸子虎賁氏太僕司甲司弓矢  
齊右齊僕士師小行人下大夫○周禮疏云諸侯三卿  
司徒司馬司空大夫五人謂司徒下二大夫一大夫為

司徒大夫一大夫為太宰大夫司空下二大夫一大夫  
主司空事一大夫為司空大夫司馬事省闕一大夫故  
五人親王子弟食邑與三公同在五百里置地各百里  
其次疏者在四百里縣地各五十里與六卿同二者得  
立兩卿五大夫六卿雖尊位在天子下故屈而立兩卿  
不足于諸侯其次更疏者在五百里稍地各食二十五  
里與大夫同不得立兩卿五大夫亦職相兼也

邦君諸侯

尚書云列爵維五分土維三周禮曰八命作牧九命作伯又云上公九命為伯侯伯七命子男五命又云邦畿方千里其外方五百里謂之侯服歲一見其貢祀物又其外方五百里謂之甸服二歲一見其貢嬪物又其外方五百里謂之男服三歲一見其貢器物又其外方五百里謂之采服四歲一見其貢服物又其外方五百里謂之衛服五歲一見其貢材物又其外方五百里謂之要服六歲一見其貢貨物九州之外謂之蕃國世一見

各以其所貴寶為摯○禮記曰諸侯賜弓矢然後征賜  
鈇鉞然後殺賜圭瓚然後為鬯○白虎通云伏羲氏之  
王天下也爵有五等以法五行也或三等者法三光也  
質家據天故法三光文家據地故法五行含文嘉曰殷  
爵三等周爵五等各有宜也○初學記云易稱先王建  
萬國親諸侯史記云黃帝置左右大監以監萬國堯典  
云協和萬邦左傳云禹會諸侯于塗山執玉帛者萬國  
萬國之數蓋親賢兼封夏列九州制五服立爵三等分

地有三公侯方百里伯方七十里子男五十里不足五十里曰附庸殷則爵列三等周又列為五等則公方五百里侯伯子男各百里為差不滿百里為附庸凡王之子弟並參封之

摯御

朱傳云近侍也○楚語居寢有摯御之箴注摯近也

舌

釋名云舌洩也舒洩所當言也舌卷也可以卷制物使



不落也○元命包云舌之為言達也陽立于三故舌在口中者長三寸象斗玉衡陰合有四故舌淪入噤內者長四寸○養性經云舌者和之候也

王都

釋名云國城曰都者國君所居人所都會也

血

釋名云血濺也出于肉流濺濺也○文子云人受天地變化而生一月而膏二月血脉又云血氣者人之華也

○素問云諸血者皆屬於心肝受血而能視足受血而能步掌受血而能握指受血而能攝

小旻篇

龜

爾雅云龜三足賁俯者靈仰者謝前弇諸果後弇諸獵左倪不類右倪不若一曰神龜二曰靈龜三曰攝龜四曰寶龜五曰文龜六曰筮龜七曰山龜八曰澤龜九曰水龜十曰火龜○易云或益之十朋之龜離為龜○易

緯云靈蓍四十九莖下有千歲龜守之○禹貢云九江納錫大龜○雜書云靈龜王者不偏黨尊者老則出○逸周書云伊尹請正西以神龜為獻○周禮鼈人秋獻龜魚龜人掌六龜之屬天龜曰靈屬地龜曰繹屬東龜曰果屬西龜曰雷屬南龜曰臘屬北龜曰若屬各以其方之色與其體辨之凡取龜用秋時攻龜用春時各以其物入于龜室上春蒙龜○大戴禮云甲蟲三百六十而龜為之長○月令云季秋登龜取鼈季冬命大史蒙

龜筮禮運云龜以為畜故人情不失○逸禮云天子龜尺二寸諸侯八寸大夫六寸民士四寸龜者陰蟲之老也龜三千歲上游於卷耳上老者先知故君子舉事必攷之○禮斗威儀云君乘土而王則龜被文而見○運斗樞云瑤光星散為龜○管子云伏閭能存而能亡者著龜與龍是也龜生于水發之于火於是為萬物先為禍福正○史記云龜千歲乃游蓮葉之上江旁人家常畜龜飲食之以為能導引致氣有益于助衰養老○褚

先生云一曰北斗龜二曰南辰龜三曰五星龜四曰八  
風龜五曰二十八宿龜六曰日月龜七曰九州龜八曰  
王龜凡八名龜各有文在腹下此龜不必滿尺二寸民  
人得長七八寸可寶矣○論衡孔子云龍食於清游于  
清龜食於清游于濁魚食於濁游于清○說苑云靈龜  
文五色似玉似金背陰向陽上隆象天下平法地槃衍  
象山四趾轉運應四時文著象二十八宿蛇頭龍翅左  
精象日右精象月千歲之化下氣上通能知存亡吉凶

之變寧則信信如也動則著矣○龜經云龜一千二百  
歲可卜天地之終始又云夫龜甲黃足赤眼白尾青腹  
黑者蓋稟受乎五行之粹也○埤雅云龜舊也外骨內  
肉腸屬于首廣肩無雄與虵為匹故龜與虵合謂之玄  
武化書曰龜龜相顧神交也言龜亦有以神交者易曰  
舍爾靈龜蓋龜有靈德伏匿而噓善潛而不志於養

小宛篇

螟蛉

爾雅云螟蛉桑蟲郭注俗謂之桑蠋亦曰戎女○陸璣云螟蛉者桑上小青蟲也似步屈其色青而細小或在草萊上

螺羸

爾雅云螺羸蒲盧郭注即細腰蟲也俗呼為蠚蠚○說文云細腰土蠚也天地之性小腰純雄無子○陸璣云螺羸土蜂也似蜂而小腰取桑蟲負之于木空中七日而化為其子○列子云純雄其名穉蜂○方言曰蠚趙

燕之間謂之蠓螋其小者謂之蠓螋或謂之蚘蛭○法  
言云螟蛉之子殪而逢果羸祝之曰類我類我久則肖  
之矣○博物志云蜂無雌取桑蟲或阜螽子抱而成已  
子○本草蠓螋一名土蜂陶隱居云此類甚多雖名土  
蜂不就土中為窟謂撻土作房爾今一種黑色腰甚細  
銜泥于入室及器物邊作房如併竹管者是也其生子  
如粟米大置中乃捕取草上青蜘蛛十餘枚滿中仍塞  
口以擬其子大為糧其一種入蘆竹管中者亦取草上



青蟲一名螺贏詩人云螟蛉有子螺贏負之言取青蟲  
教祝變為己子斯為謬矣唐本注云土蜂土中為窠大  
如烏蜂不傷人非蠓螋蠓螋不入土中為窠○段成式  
云書齋中多蠓螋好作窠于書卷或在筆管中祝聲可  
聽有時開卷視之悉是小蜘蛛大如蠅虎以泥隔之乃  
知不獨負桑蟲也○宋齊丘云蠓螋之蟲負螟蛉之  
子傳其情交其精混其氣和其神隨物大小皆得其真  
蠢動無定精萬物無定形○范處義云說者攷之不精

乃謂螺贏負桑蟲為子近世詩人取螺贏之巢毀而視之乃自有細卵如粟寄螟蛉之身以養之其螟蛉不死蠢然在穴中久則螟蛉盡枯其卵日益長大乃為螺贏之形穴竅而出

按螺贏煦嫗螟蛉以成其子揚雄鄭玄皆有是說列子云純雄其名穉蜂莊子云細腰者化是也惟陶隱居以為不然有擬子大為糧之論而鄭樵駁之以為後人壞螺贏房見有卵如粟在死蟲上者是變與未

變耳將故房看之其蟲殼皆如蛻形則非為物所食  
明矣范處義之說更益可疑彼所謂詩人者業已剖  
視其房見有不生不死之螟蛉後日何待穴竅而出  
且巢破子應毀何得日益長大蓋欲創新說因貞白  
之論而影響測度非實事也楊用修引之于丹鉛錄  
不思甚矣

桑扈

爾雅云鴈鵠又云桑鴈竊脂郭云俗謂之青雀嘴曲食

肉好盜脂膏因名云又云春鴈鴈鵠夏鴈竊玄秋鴈竊  
藍冬鴈竊黃桑鴈竊脂棘鴈竊丹行鴈喈喈宵鴈嘖嘖  
注諸鴈皆因其名色音聲以為名疏云釋獸云虎竊毛  
謂之號貓鼬如小熊竊毛而黃竊即古淺字竊脂為淺  
白也而諸儒必為盜竊脂膏者以此經下別云桑扈與  
竊黃等並列則為淺白者也春秋九扈是也此自別一  
種青雀好竊脂肉目驗而然詩交交桑扈是也○左傳  
云九扈為九農正賈逵注云桑扈竊脂為蠶驅雀者也

○山海經云嵒有鳥焉如鶚赤身白首其名竊脂注云今呼青雀為竊脂疑非此也○淮南子云馬不食脂桑扈不食粟非廉也○通志云桑扈今名蠟背性慧可教多在桑木故名○埤雅云桑扈一名而二種詩所謂率場啄粟者以性之竊脂膏者言故以啄粟為失其性所謂有鶯其羽者以色之淺白者言故其序曰君臣上下動無禮文焉爾雅主詩言之小雅桑扈所取有兩故亦兩解○補傳曰或指其色或指其性實一物耳

岸

傳云岸訟也○韓詩作犴云鄉亭之繫曰犴朝廷曰獄

小弁篇

鶯

爾雅云鶯斯鶯鵒郭云雅鳥也小而多羣腹下白江東亦呼為鶯鳥○小爾雅云小而腹下白不反哺者謂之雅鳥○說文云雅楚鳥也一名鶯一名鶯居秦謂之雅○法言云頻頻之黨甚於鶯斯亦賊夫糧食而已○東

都賦云鵙鵙秋棲○通志云雀類差小多羣飛食穀俗呼必鳥鵙音匹聲相近

按孔氏以斯為語辭而譏劉孝標類苑立鶯斯之目然爾雅法言俱名鶯斯何以定斯之一字必為語辭乎鄭夾漈通志亦曰鶯斯

毛

說文眉髮之屬及獸毛也○釋名云毛貌也冒也在表所以別形貌且以自覆冒也

辰

箋云謂六物之吉凶○左傳晉侯謂伯瑕曰何謂六物對曰歲時日月星辰是謂也服虔云歲歲星之神也左行于地十二歲而一周時四時也日十日也月十二月也星二十八宿也辰十二辰也

足

釋名足續也言續蹠也又云足底也○禮記云足容重

壞木



壞說文作癭云病也一曰腫旁出也○爾雅云癭木符婁某氏曰詩云譬彼癭木疾用無枝符婁𠂔𠂔內疾癭磊故疾用無枝郭璞曰謂木病𠂔𠂔偃癭腫無枝條

瑾

傳云瑾路冢也○說文作瑾云道中死人人所覆也○左傳云道瑾相望

巧言篇

寢

爾雅云室無東西廂曰寢○周禮隸僕掌五寢之埽除糞灑之事祭祀修寢大喪復於小寢大寢注云五寢五廟之寢也周天子七廟惟祧無寢詩云寢廟繹繹相連貌也前曰廟後曰寢小寢高祖以下廟之寢也始祖曰大寢○朱傳云凡廟之制前廟以奉神後寢以藏衣冠祭于廟而燕于寢

兔兔

倉頡解詁云兔大兔也

犬

詳見召南鴈

說文云犬狗之有懸蹄者也孔子曰視犬之字如畫狗也○何承天纂文曰守犬為獫隴西以犬為猷

階

說文陞也○喪大記虞人設階注梯也○釋名云階梯也如梯之等差也

微腫

爾雅云𦞦瘍為微腫足為腫郭注𦞦脚脛也瘍瘡也孫

炎曰皆水濕之疾也

何人斯篇

暴  
附蘇

鄭氏曰暴蘇皆畿內國名○春秋文公八年公子遂會  
維戎盟于暴杜注云鄭地○路史云暴新公采鄭邑也  
一曰隧○成十一年傳云昔周克商使諸侯撫封蘇忿  
生以溫為司寇○寰宇記溫縣故國已姓蘇忿生所封  
○世本云暴卒公作壘蘇成公作簏○一統志河南懷

慶府溫縣周為蘇忿生之封邑

陳

爾雅云堂塗謂之陳孫炎曰堂下至門之徑○攷工記堂涂十有二分

壝

爾雅云大壝謂之昭注壝燒土為之大如鵠子銳上平底形如稱錘六孔小者如雞子○風俗通云壝燒土為也圍五寸半長一寸半有四孔其二通凡六孔○白虎

通云壘坎音也在十一月陽氣于黃泉之下薰蒸而萌  
○釋名云壘喧也聲濁喧喧然也○周禮小師掌教壘  
瞽矇掌播壘笙師掌教吹壘○樂記曰鞀鼓柷敔壘箎  
此六者德音之音也○世本云暴辛公作壘○呂氏春  
秋云倕作壘箎○唐樂志云壘熏也立秋之音萬物將  
曛黃也○樂書云壘立秋之音平底六孔水之數也中  
虛上銳火之形也以水火合而成器亦以水火和而成  
聲故大者聲合黃鍾大呂小者聲合太簇夾鍾古有雅

塤如雁子頌塤如雞子又云土埏埴以成器而沖氣出焉其風則坤其方則西南之維其時則秋夏之交其風則涼其聲尚宮其音則濁立秋之氣也

簫

爾雅云大簫謂之沂孫炎曰沂悲也郭璞曰簫以竹為之長尺四寸圍三寸一孔上出寸三分名翹橫吹之小者尺二寸廣雅云八孔邢昺曰鄭司農注周禮云簫七孔蓋不數其上出者故七也○廣雅云簫長尺四寸有

八孔前有一孔上有三孔後有四孔頭有一孔○風俗  
通云簫管樂十孔長尺一寸○釋名云簫啼也聲從孔  
出如嬰兒啼聲也○周禮云笙師掌教吹簫○月令云  
仲夏之月命樂師調簫簫世本云蘇成公造簫吹孔有  
觚如酸棗○竹譜云有竹象蘆因以為名東甌諸郡緣  
海所生凡今之簫匪茲不鳴

詛

周禮司盟掌盟載之法盟萬民之犯命者詛其不信者



有獄訟者則使之盟詛各以其地域之衆庶共其牲而致焉詛祝掌盟詛之祝號作盟詛之載辭以叙國之信用以質邦國之劑信○毛氏云詛君以豕臣以犬民以雞○韓詩云盟牲所用天子諸侯以牛豕大夫以犬庶人以雞○鄭氏曰大事曰盟小事曰詛賈公彥曰盟者盟將來詛者詛往過○左傳注云詛以禍福之言相要○陳祥道曰盟有繼之以詛詛有不繫于盟大事必盟而或詛詛以詛往過而或為將來盟詛皆坎牲加書以

告神明其異者盟有執耳歎血既盟有祈而詛無是也

### 鬼

說文云人所歸為鬼○韓詩外傳云人死肉歸于土血歸于水骨歸于石魂氣升于天其陰氣薄然獨存無所依也故純陰底滯之氣著人為害

### 蜮

陸璣云一名射影如龜三足江淮水皆有之人在岸上影見水中投人影則殺之故曰射影南人將入水先以

瓦石投水中令水濁然後入或曰含沙射人皮膚其瘡如疥○周禮壺涿氏掌除水蟲注狐蜮之屬○漢五行志云劉向以為蜮生南越越地多婦人男女同川淫女為主亂氣所生故聖人名之曰蜮蜮猶惑也在水旁能射人甚者至死南方謂之短狐劉歆以為蜮盛暑所生非自越來也○京房易傳云忠臣進善君不試厥咎國生蜮○韓詩外傳云短狐水神也○抱朴子云蜮一名射工一名射影水蟲也狀似鳴蜩有翼能飛口中有橫

物聞人聲以氣為矢激水射人中身即發瘡病似大傷  
寒不治殺人冬天蟄谷間大雪時索之此蟲所在雪不  
積留氣起如灼蒸當掘之入地一尺則得也○玄中記  
云水孤者視其形蟲也其氣乃鬼也長三四寸色黑廣  
寸許背上有甲厚三分許其頭有角去二三步則氣射  
人中十人六七人死鴛鴦鴛鴦蟾蛛悉食之○地里志  
云江南山溪水中有射工甲蟲之類也長一二寸口中  
有弩以氣射人影隨所著處發瘡○南越志云水弩四

月一日上弩射人影至八月卸弩○埤雅云一名溪毒俗呼水弩鵝能食之禽經所謂鵝飛則蜮沈○雅翼云說者言水弩狀如蜮娘尾長四寸即弩也

按蜮劉向以為生于南越百越之地至秦方入中國詩人豫以入咏當是中國亦有之耳然本一物也或言如龜鱉三足或言如鳴蜩或言如蜮娘或言甲蟲或言有翼能飛或言長三四寸或言長一二寸或言含沙射人或言激氣射人其說紛錯如此漢書東方

朔傳人主之大蜮師古云魅也說者以為短狐非也  
錢白石又云說文所謂似鱉三足者能也非蜮也韻  
會因以鬼魅之蜮音惑短狐之蜮音域亦未知然

面

說文云面顏前也○釋名云面漫也○七發云太子陽  
氣見于眉宇之間浸淫而上幾滿大宅注大宅面也○  
真誥云面者神之庭

巷伯篇

貝

說文云貝海介蟲也古者貨貝而寶龜至周而有泉到秦廢貝行泉○爾雅云貝陸居賤在水者蝓大者鮐小者鯖玄貝貽貝餘貶黃白文餘泉白黃文虵博而頽蝨大而險蟻小而橢○書云揚州厥篚織貝又顧命云大貝鼗鼓在西房○詩義疏云貝龜鱉屬餘蜆黃為質以白為文餘泉白為質黃為文又有紫貝白質如玉紫點為文皆行列相當大者至尺六七寸今九真交趾以為

杯盤寶物○運斗樞云搖光得江吐大貝○山海經云  
陽山濁洛之水注于蕃之澤中多文貝陰山漁水中多  
文貝邽山濛水多黃貝蒼梧之野爰有文貝○相貝經  
云盈尺如赤電黑雲謂之紫貝素質紅黑謂之珠貝青  
地綠文謂之綬貝黑文黃畫謂之霞貝紫愈疾珠明目  
綬消氣障霞伏蛆蟲貝大者如輪浮貝使人寡濯貝使  
人善驚雖貝使病瘡疔貝使胎消惠貝使善忘管貝使  
童愚女淫碧貝使人盜委貝使志強○南州異物志云



交趾北南海中有大文貝質白而文紫天姿自然不假  
雕琢磨瑩而光色煥爛○交州記云大貝出日南如酒  
杯小貝貝齒也善治毒俱有紫色○埤雅云貝中肉如  
科斗而有首尾以其背用故謂之貝

箕

疏云箕四星二為踵二為舌踵狹而舌廣○詩緯云箕  
為天口主出氣○春秋緯云月離于箕風揚沙○史記  
天官書云箕為教客曰口舌索隱曰宋均云教調弄也

箕以簸揚調弄為象箕又受物有去去來來客之象也  
○晉書云箕四星亦後宮妃后之府亦曰天津一曰天  
鷄凡日月宿在箕東壁翼軫者風起又主口舌主客蠻  
夷胡貊故蠻夷將動先表箕焉○荊州星占云箕舌一  
星動則大風至不出三日又云箕第二星名風后

豺

爾雅云豺狗足郭云脚似狗貪殘之獸○禮記季秋之  
月豺乃祭獸戮禽又云豺祭獸然後田獵○左傳云戎

狄豺狼不可厭也○說文云豺狼屬狗聲○埤雅云豺似狗而長尾白頰高前廣後其色黃季秋取獸四面陳以祀其先世謂之祭獸豺柴也豺體細瘦故謂之豺○雅翼云豺牙如錐足前矮後高肉酸不宜食

有北

傳云北方寒涼而不毛○莊子云窮髮之北

楊園

傳云楊園園名

按楊生下濕欲之高地者先歷卑處故云猗于畝丘也乃是園中有楊非必有園名楊園也

畝丘

爾雅云如畝畝丘李巡曰謂丘有壟界如田畝曰畝丘也孫炎曰方百步也

六家詩名物疏卷三十九